

韋蘇州集

冊一



韋蘇州集

四部全書

四部備要

集部

上海中華書局據項氏翻
宋本校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

韋蘇州集序

韋蘇州唐史不載其行事林寶姓纂云周逍遙公竄之後左僕射扶陽公待價生司門郎中令儀令儀生鑾鑾生應物應物生監察御史河東節度掌書記慶復李肇國史補云爲性高潔鮮食寡欲所居焚香掃地而坐其爲詩馳驟建安已還各得風韻詳其集中詩天寶時扈從遊幸疑爲三衛永泰中任洛陽丞京兆府功曹大曆十四年自鄂縣令制除櫟陽令以疾辭歸善福精舍建中二年由前資除比部員外郎出爲滁州刺史改刺江州追赴闕改左司郎中貞元初又歷蘇州罷守寓居永定精舍其後事迹究尋無所見肇又云開元以後位卑而著名者李北海王江寧李館陶鄭廣文元魯山蕭功曹張長史獨孤常州崔比部梁補闕韋蘇州以集中事及時人所稱考其仕宦本末得非遂止於蘇邪案白居易蘇州答劉禹錫詩云敢有文章替左司左司蓋謂應物也官稱亦止此有集十卷而綴敘猥并非舊

次矣今取諸本校定仍所部居去其雜廁分十五總類合五百七十一篇題曰韋蘇州集舊或云古風集別號禮上西齋吟藁者又數卷可以繕寫嘉祐元年十二月二十二日太原王欽臣記

韋蘇州集卷第一

蘇州刺史韋 應物

古賦一首

冰賦

雜擬二十一首

擬古詩十二首

雜體五首

與友生野飲效陶體一首

效何水部二首

效陶彭澤一首

燕集二十一首

大梁亭會李四栖梧作一首

燕李錄事一首

淮上喜會梁川故人一首

揚州偶會前洛陽盧耿主簿一首

賈常侍林亭燕集一首

月夜會徐十一草堂一首

移疾會詩客元生與釋子法朗因貽諸曹一首

慈恩伽藍清會一首

夜偶詩客操公作一首

與韓庫部會王祠曹宅一首

晦日處士叔園林燕集一首

扈亭西陂燕賞一首

西郊燕集一首

春宵燕萬年吉少府中孚南館一首

滁州園池燕元氏親屬一首

郡樓春燕一首

南塘泛舟會元六昆季一首

郡齋雨中與諸文士燕集一首顧況詩附

軍中冬燕一首

司空主簿琴席一首

與村老對飲一首

古賦

冰賦

夏六月白日當午火雲四至金石灼爍玄泉潛沸雖深居廣廈珍簟
輕箑而亦鬱鬱燠燠不能和平其氣陳王於是登別館散幽情招親
友以高會尊仲宣爲客卿睹頒冰之適至喜煩暑之暫清王乃誇賓
而歌曰含皎皎兮瓊玉姿氣淒淒兮奪天時飲之瑩骨兮何所思可
進於賓請客卿爲寡人美而賦之客諾曰美則美矣而大王不識其

短夫謂之瓊玉竊名器也氣奪天時干陰陽也內熱飲之媒其疾也
寵一物而三失德且出寒暑而至下薦宗廟而至高僕竊感之而獻
歎安得而不爲之抽毫何積陰之勝純陽乎惟此玄冰居炎天之赫
赫兮獨嚴厲乎稜稜其始也月玄冥日北陸天地閉水泉縮動靜一
變剛柔反覆壯以烈風積如羣玉由是依廣澶漫憑高崢嶸大寒御
節萬物潛形浮彩浩浩仰吞素靈羣山早曙陰壑夜明古者祭之黑
牡其藏以節被之桃弧其出以潔今明明大魏禮物必備實大王罇
俎之常品非小民造次之所致若尊卑異等頒命有度碎似墜瓊方
如截璐況粉壁雲蠹象筵霜布座有麗人皎然俱素雖衆賓之同輝
諒爲物之難固其竊名假質以謬一時之賞也如此若乃對脩竹臨
方塘俛炎作寒兮反我天常嗟絺綌之失御於三伏兮亦紈扇委篋
而內傷其嚴沍之威以干陰陽之候也如此若皎潔的皜與時消釋
或沉珠於杯或化璞於液王將甘飲聊以自適豈知乎一寒一溫日

夜相激久之以生疾兮內外不和而怵惕其翫意而媒疾也如此觀其劣足以淒一室利庖廚俾甘肥晚敗醇釀不渝非可調湊理安營魄奈何以誇客陳王於是絕然而慙曰寡人生於深宮懵於服食左右唯燕姬趙女侈服美色微客卿之言則何以雪余惑方當命有司而撤冰書盤盂以自式

雜擬

擬古詩十二首

其一

辭君遠行邁飲此長恨端已謂道里遠如何中險艱流水赴大壑孤雲還暮山無情尚有歸行子何獨難驅車背鄉園朔風一作吹卷行迹嚴冬霜斷肌日入不遑息憂歡一作懼客髮變寒暑人事易中心君詎知冰玉徒貞白客一作容

其二

黃鳥何關關幽蘭亦靡靡此時深閨婦日照紗一作綺窗裏娟娟雙
青娥微微啓玉齒自惜桃李年誤身遊俠子無事久離別不知今生
死

其二

峨峨高山巔浼浼青川流世人不自悟馳謝如驚鱗百金非所重厚
意良難得旨酒親與朋芳年樂京國京城繁華地軒蓋凌晨出垂楊
十二衢隱映金張室漢宮南北對飛觀齊白日游泳屬芳時一二云遊
冶詠康時平生自云畢

其四

綺樓何氛氲朝日正杲杲四壁含清風丹霞射其牖玉顏上哀轉絕
耳非世有但感離恨情不知誰家婦孤雲忽無色邊馬爲迴首曲絕
碧天高餘聲散秋草徘徊帷中意獨夜不堪守思逐朔風翔一去千
里道

其五

嘉樹藹初綠，靡蕪吐幽芳。君子不在賞，寄之雲路長。長信難越惜，此芳時歇孤。鳥去不還，絨情向天末。

其六

月滿秋夜長，驚鳥號北林。天河橫未落，斗柄當西南。寒蛩悲洞房，好鳥無遺音。商飆一夕至，獨宿懷重衾。舊交日千里，隔我浮與沉。人生豈草木，寒暑移此心。

其七

酒星非所酌，月桂不爲食。虛薄空有名，爲君長歎息。蘭蕙雖可懷，芳香與時息。豈如凌霜葉，歲暮靄顏色。折柔將有贈，延意千里客。草木知賤微，所貴寒不易。

其八

神州高爽地，遐瞰靡不通。寒月野無綠，寥寥天宇空。陰陽不停馭，貞

脆各有終汾沮何鄙儉考槃何退窮反志解牽跼無爲尙勞躬美人
奪南國一笑開芙蓉清鏡理容一作雲髮褰簾出深重豔曲呈皓齒
舞羅不堪風慊慊情有待贈芳爲我容可嗟青樓月流影君帷中

其九

春至林木變洞房夕含清單居誰能裁好鳥對我鳴良人久燕趙新
愛移平生別時雙鴛綺留此千恨情碧草生舊迹綠琴歇芳聲思一
作願將魂夢歡反側寐不成擘衣迷所次起望空前庭一二云擘衣迷
處所夕起望前庭孤影中自惻不知雙涕零

其十

秋天無留景萬物藏光輝落葉隨風起一作遠愁人獨何依華一作
明月屢圓缺君還浩無期如何雨絕天一二云如何雲雨絕一去音問
一作塵違

其十一

有客天一方寄我孤桐琴迢迢萬里隔託此傳幽音冰霜中自結龍
鳳相與吟絃以明直道一云絃以昭清直漆以固一作形交深

其十二

白日淇上沒空閨生遠愁寸心不可限淇水長悠悠芳樹自妍芳一
云自交結又云房樹正妍鬱春禽自相求徘徊東西廂孤妾誰與儔
年華逐絲淚一落俱不一作難收

雜體五首

沉沉匣中鏡爲此塵垢蝕輝光何所如月在雲中黑南金既彫錯
帶共輝飾空存一作有鑿物各坐使妍蚩惑美人竭肝膽思照冰玉
色自非磨瑩工日日空歎息

古宅

一作宇

集祆鳥羣號枯樹枝黃昏窺人室鬼物相與期居人不

安寢搏擊思此時豈無鷹與鷂飽肉不肯飛既乖逐鳥節空養凌雲
姿孤奉肉食恩何異城上鷗

春羅雙鴛鴦出自寒夜女心精煙霧色指歷千萬緒長安貴豪家一
作室妖豔不可數裁此百日功唯將一朝舞舞罷復裁新豈一作寧
思勞者苦

同聲自相應體質不必齊誰知賈人鐸能使大一作音樂諧鏗鏘發
宮徵和樂變其哀人神既昭享鳳鳥一作皇亦下來豈非至賤物一
奏升天階物情苟有合莫問玉與泥

碌碌荆山璞卞和獻君門荆璞非有求和氏非有恩所獻知國寶至
公不待言是非吾一作語欲默此道今豈存

與友生野飲效陶體

攜酒花林下前有千載墳於時不共酌奈此泉下人始自翫芳物行
當念徂春聊舒遠世蹤坐望還山雲且遂一懽笑焉知賤與貧

效何水部二首

玉宇含清一作秋露香籠散輕煙應當結沉抱難從茲夕眠

夕漏起遙怨蟲響亂秋陰反覆相思字中有故人心

效陶彭澤

霜露悴百草時菊獨妍華物性有如此寒暑其奈何掇英泛濁醪日
入會田家盡醉茅簷下一生豈在多

燕集

大梁亭會李四栖梧作

梁王昔愛才千古化不泯平聲至今蓬池上遠集八方賓車馬乎明
合城郭滿埃塵逢君一相許豈要平生親入仕三十載如何獨未伸
英聲久籍籍臺閣多故人置酒發清彈相與一作將樂佳辰孤亭得
長望白日下廣津富貴良可取一作求竭來西入秦秋風旦夕起安
得客梁陳

燕李錄事

與君十五侍皇闈曉拂爐煙上赤墀花開漢苑經過處雪下驪山沐

浴時近臣零落今猶一作誰在仙駕飄颻不可期此日相逢一作逢

君思一作非舊日一杯成喜亦一作又成悲

淮上喜會梁川故人

江漢曾爲客相逢每醉還浮雲一別後流水十年間歡笑情如舊蕭
疎鬢已斑何因北一作不歸去淮上對一作有秋山

揚州偶會前洛陽盧耿主簿應物頃貳洛陽常有連騎之遊

楚塞故人稀相逢本不期猶存袖裏字忽怪鬢中絲客舍盈樽酒江
行滿篋詩更能連騎出還似洛橋時

賈常侍林亭燕集

高賢侍天階一作陞跡顯心獨幽朱軒鶩關右池館在東周繚繞接
都城氤氳望嵩丘羣公盡詞客方駕永日遊朝旦氣候佳逍遙寫煩
憂綠林靄已布華沼澹不流凌露摘幽草涉煙翫輕舟圓荷既出水
廣廈可淹留放神遺所拘觥罰屢見酬樂燕良未極安知有沉浮醉

罷各云散何當復相求

月夜會徐十一草堂

空齋無一事岸幘故人期
暫輟觀書夜還題翫月詩
遠鍾高枕後清露卷簾時
暗覺新秋近殘河欲曙遲

移疾會詩客元生與釋子法朗因貽諸曹

對此嘉樹林獨有戚戚顏
抱瘵知曠職淹旬非樂閑
釋子來問訊詩人亦扣關
道同意一作適暫遣客散疾
徐還園徑自幽靜玄蟬噪
其間高牕瞰遠郊暮色起
秋山英曹幸休暇悵悵一作恨恨心所攀

慈恩伽藍清會

素友俱薄世屢招清景賞
鳴鍾悟音聞宿昔心已往
重門相洞達高宇亦遐一作通
朗嵐嶺曉城分清陰夏條長一作清條
夏陰長一作清條夏陰長
氲氛芳臺馥蕭散竹池廣
平荷隨波泛迴飆激林響
蔬食遵道侶泊懷遺滯想
何彼塵昏人區區在天壤

夜偶詩客操公作

塵襟一蕭灑清夜得禪公遠自鶴林寺了知人世空驚禽翻暗葉流水注幽叢多謝非玄度聊將詩興同

與韓庫部會王祠曹宅作

閑一作閉門蔭堤柳秋渠含夕清微風送荷氣坐客散塵纓守默共無悵抱冲俱寡營良時頗高會琴酌共開情

晦日處士叔園林燕集

遽看萸葉盡坐闕芳年賞賴此林下期清風滌煩想始萌動新煦佳禽發幽響嵐嶺對高齋春流灌蔬壤罇酒遺形迹道言屢開獎幸蒙終夕懽聊用稅歸鞅

扈亭西陂燕賞

杲杲朝陽時悠悠清陂望嘉樹始氤氳春遊方浩蕩況逢文翰侶愛此孤舟漾綠野際遙波橫雲分疊嶂公堂日爲倦幽襟自茲曠有酒

今滿盈願君盡弘量

西郊燕集

濟濟衆君子高宴及時光羣山靄遐矚綠野布熙陽列坐遵曲岸披襟襲蘭芳野庖薦嘉魚激澗泛羽觴衆鳥鳴茂林綠草延高岡盛時易徂謝浩思坐飄颺眷言同心友茲遊安可忘

春宵燕萬年吉少府中孚南館

始見斗柄迴復茲霜月霽河漢上縱橫春城夜迢遞賓筵接時彥樂燕凌芳歲稍愛清觴滿仰歎高文麗欲去返郊扉端爲一歡滯

滁州園池燕元氏親屬

日暮遊清池疏林羅一作籠高天餘綠飄霜露夕氣變風煙水門架危閣竹亭列廣筵一展私姻禮屢歎芳罇前感往在茲會傷離屬頽年明晨復云去且願此留連

郡樓春燕

衆樂雜軍鞞高樓邀上客思逐花光亂賞餘山景夕爲郡訪彫瘵守
程難損益聊假一杯歡暫忘終日迫

南塘泛舟會元六昆季

端居倦時燠輕舟泛迴塘微風飄襟散橫吹繞林長雲澹水容夕雨
微荷氣涼一寫惰勤意一云川上意寧用訴一作計華觴

郡齋雨中與諸文士燕集

兵衛森畫戟宴寢凝清香海上風雨至逍遙池閣涼煩痾近一作正
消散嘉賓復滿堂自慙居處崇未覩斯民康理會是非遺性達形迹
忘鮮肥屬時禁蔬果幸見嘗俯飲一杯酒仰聆金玉章神歡體自輕
意欲凌風一作雲翔吳中盛文史羣彥今汪洋方知大藩地一作盛
豈曰財賦疆

奉同郎中使君郡齋雨中宴集之什州民朝議郎行饒州司

士參軍員外置同正員顧況

好鳥依嘉樹飛雨灑高城況與數一作古君子列座分兩楹一作公
南楹文雅一何麗一作盛林堂含餘清我公未歸期遊子不待晴白
雲帝鄉遠滄江楓葉鳴拜手欲無言零泪如一作和酒傾寸心已摧
折別離方骨驚安得凌風翰肅肅賓天京

軍中冬燕

滄海已云晏皇恩猶念勤式燕徧恆秩柔遠及斯人茲邦實大藩伐
鼓軍樂陳是時冬服成戎士氣益振虎竹謬朝寄英賢降上賓旋罄
周旋禮媿無海陸珍庭中丸劍闌堂上鼓吹新光景不知晚觥酌豈
言頻單醪昔所感大釀況同忻顧謂軍中士仰答何由申

司空主簿琴席

煙華方散薄蕙氣猶含露澹景發清琴幽期默玄一作云悟留連白
雪意斷續迴風度掩抑雖已終忡忡在幽素

與村老對飲

鬢眉雪色猶嗜酒言辭淳朴古人風鄉村年少生離亂見話先朝如
夢中

韋蘇州集卷第一

韋蘇州集卷第一
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

韋蘇州集卷第二

蘇州刺史韋 應物

寄贈上六十二首

城中臥疾知閣薛二子屢從邑令飲因以贈之一首

聽嘉陵江水聲寄深上人一首

高陵書情寄三原盧少府一首

假中對雨呈縣中寮友一首

贈蕭河南一首

示從子河南尉班一首

趨府候曉呈兩縣寮友一首

贈李儋一首

贈盧嵩一首

寄馮著一首

早春對雪寄前殿中元侍御一首

贈王侍御一首

將往江淮寄李十九儋一首

自鞏洛舟行入黃河卽事寄府縣僚友一首

寄盧庾一首

發廣陵留上家兄兼寄上長沙一首

初發楊子寄元大校書一首

淮上卽事寄廣陵親故一首

寄洪州幕廬二十一侍御一首

經少林精舍寄都邑親友一首

同長源歸南徐寄子西子烈有道一首

雪中聞李儋過門不訪聊以寄贈一首

同德精舍養疾寄河南兵曹東廳掾一首

同德寺雨後寄元侍御李博士一首

同德閣期元侍御李博士不至各投贈二首

使雲陽寄府曹一首

過扶風精舍舊居簡朝宗巨川兄弟一首

贈令狐士曹一首

贈馮著一首

對雨寄韓庫部協一首

寄子西一首

縣內閑居贈溫公一首

對雪贈徐秀才一首

西郊遊宴寄贈邑僚李巽一首

對雨贈李主簿高秀才一首

休沐東還胄貴里示端一首

朝請後還邑寄諸友生一首

澧上西齋寄諸友一首

獨遊西齋寄崔主簿一首

紫閣東林居士叔緘賜松英丸捧對欣喜蓋非塵侶之所當

服輒獻詩代啓一首

秋集罷還途中作獻壽春公一首

閑居贈友一首

四禪精舍登覽悲舊寄朝宗巨川兄弟一首

善福閣對雨寄李儋幼遐一首

寺居獨夜寄崔主簿一首

九日澧上作寄崔主簿倬二季端繫一首

西郊養疾聞暢校書有新什見示久侍不至先寄此詩一首

澧上寄幼遐一首

善福精舍示諸生一首

晚出澧上贈崔都水一首

寓居澧上精舍寄于張二舍人一首

開元觀懷舊寄李二韓二裴四兼呈崔郎中巖家令一首

春日郊園寄萬年吉少府中孚三原元少府偉夏侯校書審
一首

澧上醉題寄滌武一首

西郊期滌武不至書示一首

澧上對月寄孔諫議一首

將往滁城戀新竹簡崔都水示端一首

還闕首途寄精舍親友一首

秋夜南宮寄澧上二弟及諸生一首

塗中書情寄澧上兩弟因送二甥却還一首

雪後下朝呈省中一絕

寄贈上

城中臥疾知閣薛二子屢從邑令飲因以贈之

車一作良馬日蕭蕭胡不枉一作在我廬方來從令飲臥病獨何如

秋風起漢一作江臯開戶望平蕪即此恠一作稀音素一作表焉知

中密踈渴者不思火寒者不求水人生羈寓一作旅時去就當如此

猶希心異跡一作從利心迹異眷眷存終始

聽嘉陵江水聲寄深上人

鑿崖泄奔湍稱古神禹跡夜喧山門店獨宿不安席水性自云一作

為靜石中本無聲如何兩相激雷轉空山驚貽之道門舊了此物我

情

高陵書情寄三原盧少府

直方難為進守此微賤班開卷不及顧沉埋案牘間兵凶久一作互

相踐徭賦豈得閑促戚下可哀寬政身致患日夕思自退出門望故
山君心儻如此攜手相與還

假中對雨呈縣中僚友

卻足甘一作堪爲笑閑居夢杜陵殘鷺知夏淺社一作時雨報年登
流麥非關忘收書獨不能自然憂曠職緘此謝良朋

贈蕭河南

厭劇辭京縣褒賢待詔書鄴侯方繼業潘令且閑居霽後三川冷秋
深一作餘萬木疎對琴無一事新興復何如

示從子河南尉班并序

永泰中余任洛陽丞以撲扶軍騎時從子河南尉班亦以剛直爲政
俱見訟於居守因詩示意府縣好我者豈曠斯文

拙直余恆守公方爾所存同占朱鳥剋俱起小人言立政思懸棒謀
身類觸藩不能林下去祗戀府廷恩

趨府候曉呈兩縣僚友

趨府不遑安中宵出戶看滿天星尚在近壁燭仍一作猶殘立馬頻
驚曙垂簾却避寒可憐同宦者應一作始悟下流難

贈古儋

絲桐本異質音響合一作今自然吾觀造化意二物相因緣誤觸龍
鳳嘯靜聞寒夜泉心神自安宅煩慮頓可捐何因知久要絲白漆亦
堅

贈盧嵩

百川注東海東海無虛盈泥滓不能濁澄波非益清恬然自安流日
照萬里晴雲物不隱象三山共分明奈何疾風怒忽若基柱傾海水
雖無心洪濤亦相驚怒號在倏忽誰識變化情

寄馮著

春雷起萌蟄土壤日已疎胡能遭盛明才俊伏里閭偃仰遂真性所

求唯斗儲披衣出茅屋盥漱臨清渠吾道亦自適退身保玄虛幸無
職事牽且覽按上書親友各馳騫誰當訪弊廬思君在何夕明月照
廣除

早春對雪寄前殿中元侍御

掃雪開幽徑端居望故人猶殘臘月酒更值早梅春幾日東城陌何
時曲水濱聞閑且共賞莫待繡衣新

贈王侍御

心同野鶴與塵遠詩似冰壺見底清府縣同趨昨日事升沉不改故
人情上陽秋晚蕭蕭雨洛水寒來夜夜聲自歎猶爲折腰吏一作客
可憐驄馬路傍行

將往江淮寄李十九儋余自西京至李又發河洛同道不遇

鷺鷥東向來文鶴亦西飛如何不相見羽翼有高卑徘徊到河洛華
屋未及窺秋風飄我行遠與淮海期迴首隔煙霧遙遙兩相思陽春

自當返短翮欲追隨

自鞏洛舟行入黃河卽事寄府縣僚友

夾水蒼山路向東
東南山豁大河通
寒樹依微遠
天外夕陽明滅亂
流中孤村幾歲臨
伊岸一鴈初晴下
朔風爲報洛橋遊
宦侶扁舟不繫與心同

寄盧庾

悠悠遠離別分此歡會難如何
兩相近反使心不安
亂髮思一櫛垢衣思一浣
協韻豈如望友生
對酒起長嘆
時節異京洛
孟冬天未寒
廣陵多車馬
日夕自遊盤
獨我何耿耿
非君誰爲歡

發廣陵留上家兄兼寄上長沙

將違安可懷
宿戀復一方
家貧無舊業
薄宦各飄颺
執板身有屬
淹時心恐惶
拜言不得留
聲結淚滿裳
漾漾動行舫
亭亭遠相望
離晨苦須臾
獨往道路長
蕭條風雨過
得此海氣涼
感秋意已違
況自結

中腸推道固當遣及情豈所忘何時共還歸舉翼鳴春陽

初發楊子寄元大校書

悽悽去親愛泛泛入煙霧歸棹洛陽人殘鍾廣陵樹今朝此爲別何處還相遇世事波上舟泝洄安得住

淮上卽事寄廣陵親故

前舟已眇眇欲渡誰相待秋山起暮鍾楚雨連滄海風波離思滿一
作遠宿昔容鬢改獨鳥下東南廣陵何處在

寄洪州幕府盧二十一侍御自南昌令拜頃同官洛陽

忽報南昌令乘驄入郡城同時趨府客此日望塵迎文苑臺中妙冰壺幕下清洛陽相去遠猶使故林榮

經少林精舍寄都邑親友

息駕依松嶺高閣一攀緣前瞻路已窮既詣喜更延出巘聽萬籟入林濯幽泉鳴鍾生道心暮磬一作鶴空雲煙獨往雖暫適多累終見

牽方思結茅地歸息期暮年

同長源歸南徐寄子西子烈有道

東洛何蕭條相思邈遐路策駕復誰遊入門無與晤一作出入亦無
晤還因送歸客達此緘中素屢睽心所歡豈得顏如故所歡不可睽
嚴霜晨淒淒如彼萬里行孤妾守空閨臨觴一長歎素欲何時諧

雪中聞李儋過門不訪聊以寄贈

度門能不訪冒雪屢西東已想人如玉遙憐馬似驄乍迷金谷路稍
變上陽宮還比相思意紛紛正滿空

同德精舍養疾寄河南兵曹東廳掾

逍遙東城隅雙樹寒葱蒨廣庭流華月高閣凝餘霰杜門非養素抱
疾阻良讌孰謂無他人思君歲云變官曹亮先忝陳躅慙俊彥豈知
晨與夜相代不相見緘書問所如一云所知訓藻當芬綯

同德寺雨後寄元侍御李博士

川上風雨來須臾滿城闕岩嶢青蓮界一作宇蕭條孤興發前山遽
已淨陰靄夜來歇喬木生夏涼流雲吐華月巖城自有限一水非難
越相望曙河一作何遠高齋坐超忽

同德閣期元侍御李博士不至各投贈二首

庭樹忽已暗故人那一作何不來祇應厭煩暑永日坐霜臺
官榮多所繫閑居亦憊期高閣猶相望青山欲暮時

使雲陽寄府曹

夙駕祇府命冒炎不遑息百里次雲陽閭閻問漂溺上天屢憊氣胡
不均寸澤仰瞻喬樹顛見此洪流跡良苗免湮沒蔓草生宿昔頽墉
滿故墟返喜將安宅周旋涉塗潦側峭緣溝脈仁賢憂斯民賤子甘
所役公堂衆君子言笑思與覲

過扶風精舍舊居簡朝宗巨川兄弟

佛刹出高樹晨光閭井中年深念陳跡迨此獨忡忡零落逢故老寂

寥悲草蟲舊宇多改構幽篁延本藜栖止事如昨芳時去已空佳人亦攜手再往今不同新文聊感舊想子意無窮

贈令狐士曹自八月朔日同使藍田淹留涉季事先半日而不相待故有戲贈

秋簷一作霜滴滴對床寢山路迢迢聯騎行到家俱及東籬菊何事先歸半日程

贈馮著

契闊仕兩京念子亦飄蓬方來屬追往十載事不同歲晏乃云至微褐還未充慘悽遊子情風雪自關東華觴發懽顏嘉藻播清風始此盈抱恨曠然一夕中善蘊豈輕售懷才希國工誰當念素士零落歲華空

對雨寄韓庫部協

颯至池館涼靄然和曉霧蕭條集新荷氛氳散高樹閑居興方澹默

想心已屢暫出仍濕衣況君東城住

寄子西

夏景已難度懷賢思方續喬樹落疎陰微風散煩燠傷離枉芳札忻
遂見心曲藍上舍已成田家雨新足託鄰素多欲一作願殘秩猶見
東日夕上高齋但望東原綠

縣內閑居贈溫公

滿郭春色嵐已昏鷗栖散吏掩重門雖居世網常清淨夜對高僧無
一言

對雪贈徐秀才

靡靡寒欲收靄靄陰還結晨起望南端千林散春雪妍光屬瑤階亂
緒陵新節無爲掩扉臥獨守袁生轍

西郊遊宴寄贈邑僚李巽

升陽曖春物置酒臨芳席高宴闕英僚衆賓寡歡懌是時尙多壘板

築興頽壁羈旅念越疆領徒方祗役如何嘉會日當子憂勤夕西郊
鬱已茂春嵐重如積何當返徂雨雜英紛可惜

對雨贈李主簿高秀才

灑迤曙雲薄散漫東風來青山滿春野微雨灑輕埃吏局勞佳士賓
筵得上才終朝狎文墨高興共徘徊

休沐東還胄貴里示端

宦遊三十載田野久已疎休沐遂茲日一來還故墟山明宿雨霽風
暖百卉舒泓泓野泉潔熠熠林光初竹木稍摧翳園場亦荒蕪俯驚
鬢已衰周覽昔所娛存沒惻私懷遷變傷里閭欲言少留心中復畏
簡書世道良自退榮名亦空虛與子終攜手歲晏當來居

朝請後還邑寄諸友生

宰邑分甸服夙駕朝上京是時當暮春休沐集友生抗志青雲表俱
踐高世名樽酒且歡樂文翰亦縱橫良遊昔所希累讎夜復明晨露

含瑤琴夕風殞素英一日遵歸路伏軾出京城誰言再念別忽若干
里行閉閣寡誼訟端居結幽情況茲晝方永展轉何由平

禮上西齋寄諸友七月中善福之西齋作

絕岸臨西野曠然塵事遙清川下灑迤茅棟上岩嶢翫月愛佳夕望
山屬清朝俯砌視歸翼開衿納遠颺等陶辭小秩効朱方負樵閑遊
忽無累心跡隨景超明世重才彥雨露降丹霄羣公正雲集獨予忻
寂寥

獨遊西齋寄崔主簿

同心忽已別昨事方成昔幽逕還獨尋綠苔見行跡秋齋正蕭散煙
水易昏夕憂來結幾重非君不可釋

紫閣東林居士叔緘賜松英丸捧對忻喜蓋非塵侶之所當
服輒獻詩代啓

碧澗蒼松五粒稀侵雲采去露沾衣夜啓羣仙合靈藥朝思俗侶寄

將歸道場齋戒今初服人事葷羶已覺非一望嵐峯拜還使腰間銅
印與心違

秋集罷還途中作謹獻壽春公黎公

束帶自衡門奉命宰王畿君侯枉高鑒舉善掩瑕疵斯民本已安工
拙兩無施何以酬明德歲晏不磷緇時節乃來集欣懷方載馳平明
大府開一得拜光輝温如春風至肅若巖霜威羣屬所載瞻而忘倦
與飢公堂燕華筵禮罷復言辭將從平明道憩車澧水湄山川降嘉
歲草木蒙潤滋孰云還本邑懷戀獨遲遲

閑居贈友

補吏多下遷罷歸聊自度園廬既蕪沒煙景空澹泊閑居養痾瘵守
素甘葵藿顏鬢日衰耗冠帶亦寥落青苔已生路綠筠始分籜夕氣
下遙陰微風動疎薄草玄良見諠杜門無請託非君好事者誰來顧
寂寞一作誰能

四禪精舍登覽悲舊寄朝宗巨川兄弟

蕭散人事憂迢遰古原行春風日已暄百草亦復生躋閣謁金像攀
雲造禪扃新景林際曙雜花川上明徂歲方緬邈陳事尙縱橫溫泉
有佳氣馳道指京城攜手思故日山河留恨情存者邈難見去者已
冥冥臨風一長慟誰畏行路驚

善福閣對雨寄李儋幼遐

飛閣凌太虛晨躋鬱崢嶸驚颿觸懸檻白雲冒層甍太陰布其地密
雨垂八紘仰觀固不測俯視但冥冥感此窮秋氣沉鬱命友生及時
未高步羈旅遊帝京聖朝無隱才品物俱昭形國士秉繩墨何以表
堅貞寸心東北馳思與一會并我車夙已駕將逐晨風征郊塗住成
淹默默阻中情

寺居獨夜寄崔主簿

幽人寂不一作無寐木葉紛紛落寒雨暗深更流螢度高閣坐使青

燈曉還傷夏衣薄寧知歲方晏離居更蕭索

九日澧上作寄崔主簿倬二李端繫

淒淒感時節望望臨澧涘翠嶺明華秋高天澄遙滓川寒流愈迅霜
交物初委林葉索已空晨禽迎颿起時菊乃盈泛濁醪自爲美良遊
雖可娛殷念在之子人生不自省營欲無終已孰能同一酌陶然冥
斯理

西郊養疾聞暢校書有新什見贈久佇不至先寄此詩

養病愜清夏郊園數卉木窗夕一作戶含澗涼雨餘愛筠綠披懷始
高詠對琴轉幽獨仰子遊羣英吐詞如蘭馥還聞枉嘉藻佇望延昏
旭唯見草青青閉門澧水曲

澧上寄幼遐

寂寞到城闕惆悵返柴荆端居無所爲念子遠徂征夏晝人已息我
懷獨未寧忽從東齋起兀兀尋澗行冒罍叢榛密披翫孤花明曠然

西南望一極山水情周覽同遊處逾恨阻音形壯圖非旦夕君子勤
令名勿復久留燕蹉跎在北京

善福精舍示諸生

湛湛嘉樹陰清露夜景沉悄然羣物寂高閣似陰岑方以玄默處豈
爲名跡侵法妙一作泛如不知歸獨此抱冲襟齋舍無餘物陶器與
單衾諸生時列坐共愛風滿林

晚出灋上贈崔都水

臨流一舒嘯望山意轉延隔林分落景餘霞明遠川首起趣東作已
看耘夏田一從民里居歲月再徂遷味質得全性世名良自牽行忻
攜手歸聊復飲酒眠

寓居灋上精舍寄于張二舍人

萬木藂雲出香閣西連碧澗竹林園高齋猶宿遠山曙微霰下庭寒
雀喧道心淡泊對流水生事蕭疎空掩門時憶故交那得見曉排闥

闔奉明恩

開元觀懷舊寄李二韓二裴四兼呈崔郎中巖家令

宿昔清都燕分散各西東車馬行跡在霜雪竹林空方軫故物念誰復一樽同聊披道書暇還此聽松風

春日郊居寄萬年吉少府中孚三原少府偉夏侯校書審

谷鳥時一轉田園春雨餘光風動林早高窗照日初獨飲澗中水吟詠老氏書城闕應多事誰憶此閑居

澧上醉題寄滌武

芳園知夕燕西郊已獨還誰言不同賞俱是醉花間

西郊期滌武不至書示

山高鳴過雨澗樹一云林澗落殘花非關春不待當由期自賒

澧上對月寄孔諫議

思懷在雲闕泊素守中林出處雖殊跡明月兩知心

將往滁城戀新竹簡崔都水示端

停車欲去繞藂竹偏愛新筠十數竿莫遣兒童觸瓊粉留待幽人迴
日看

還闕首途寄精舍親友

休沐日云滿沖然將罷觀嚴車候門側晨起正一作整朝冠山澤含
餘雨川澗注驚湍攬轡遵東路一云登前路迴首一長歎居人已不
見高閣在林端

秋夜南宮寄澧上二弟及諸生

暝色起煙閣沉抱積離憂況茲風雨夜蕭條梧葉秋空宇感涼至頽
顏驚歲周日夕遊闕下山水憶同遊

塗中書情寄澧上兩弟因送二甥却還

華簪豈足戀幽林徒自違遙知別後意寂寞掩郊扉迴首昆池上更
羨爾同歸

雪後一作夜下朝呈省中一絕

南望青山滿禁闈
曉陪鴛鷺正差池
共愛朝來何處雪
蓬萊宮裏拂松枝

韋蘇州集卷第二

韋蘇州集卷第三

蘇州刺史韋應物

寄贈下六十二首

寄柳州韓司戶郎中一首

寄令狐侍郎一首

閑居寄端及重陽一首

園林晏起寄昭應韓明府盧主簿一首

寄大梁諸友一首

新秋夜寄諸弟一首

郊園聞蟬寄諸弟一首

寄中書劉舍人一首

郡齋感秋寄諸弟一首

郡中對雨贈元錫兼簡楊凌一首

冬至夜寄京師諸弟懷崔都水一首

元日寄諸弟兼呈崔都水一首

寄職方劉郎中一首

社日寄崔都水及諸弟羣屬一首

寒食日寄諸弟一首

贈李儋侍御一首

寄楊協律一首

楊詩附

孤靈主戰一首

郡齋贈王卿一首

簡恒璨一首

閑居寄諸弟一首

登樓寄王卿一首

寄暢當一首

贈崔員外一首

寄李儋元錫一首

京師叛亂寄諸弟一首

贈琮公一首

寄諸弟一首

寄恒燦上元一首

簡郡中諸生一首

寄全椒山中道士一首

寄釋子良史酒一首

重寄一首

答釋子良史送酒瓢一首

簡陟巡建三甥一首

覽襄子臥病一絕聊以題示一首

寄璨師一首

寄盧陟一首

塗中寄楊邈裴緒示褻子一首

宿永陽寄璨律師一首

雪行寄褻子一首

寄裴處士一首

偶入西齋院示釋子恒璨一首

示全真元常一首

● 寄劉尊師一首

寄廬山樸衣居士一首

因省風俗與從姪成緒遊山水中道先歸寄示一首

寒食寄京師諸弟一首

歲日寄京師諸季端武等一首

簡盧陟一首

西澗卽事示盧陟一首

登郡樓寄京師諸季淮南子第一首

寄黃尊師一首

寄黃劉二尊師一首

秋夜寄丘二十二員外一首丘詩附

贈丘員外二首丘詩附

贈李判官一首

寄皎然上人一首

贈舊識一首

復理西齋寄丘員外一首

和張舍人夜直中書寄吏部劉員外一首

和李二主簿寄淮上綦母三一首

寄二巖一首

寄贈下

寄柳州韓司戶郎中

達一作遠識與昧機智殊跡同靜於焉得攜手屢賞清夜景蕭灑陪
高詠從容羨華省一逐風波遷南登桂陽嶺舊里門空掩歡一作新
遊事皆屏悵望城闕遙幽居時序永春風吹百卉和煦變閭井獨悶
終日眠篇書不復省唯當望雨露霑子荒遐境

寄令狐侍郎

三山有瓊樹霜雪色逾新始自風塵交中結綢繆姻西掖方掌誥南
宮復司春夕燕華池月朝奉玉階塵衆寶歸和氏吹噓多俊人羣公
共然諾聲問邁時倫孤鴻既高舉燕雀在荆榛翔集且不同豈不欲
殷勤一日遷南郡江湖渺無垠寵辱良未定君子豈緇磷寒暑已推
斥別離生苦辛非將會面日書札何由申

閑居寄端及重陽

山明野寺曙鍾微，雪滿幽林人跡稀。
閑居寥落生高興，無事風塵獨不歸。

園林晏起寄昭應韓明府盧主簿

田家已耕作，井屋起晨煙。
園林鳴好鳥，閑居猶獨眠。
不覺朝已晏，起來望青天。
四體一舒展，情性亦忻然。
還復茅簷下，對酒思數賢。
束帶理官府，簡牘盈目前。
當念中林賞，覽物遍山川。
上非遇明世，庶以道自全。

寄大梁諸友

分竹守南譙，弭節過梁池。
雄都衆君子，出餞擁河湄。
燕謔始云洽，方舟已解維。
一爲風水便，但見山川馳。
昨日次睢陽，今夕宿符離。
雲樹愴重疊，煙波念還期。
相敦在勤事，海內方勞師。

新秋夜寄諸弟

兩地俱秋夕，相望共一作在。
星河高梧一葉下，空齋歸思多方憂。

人瘦況自抱微痾無將別來近顏鬢已蹉跎

郊園聞蟬寄諸弟

去歲郊園別聞蟬在蘭省今歲臥南譙蟬鳴歸路永夕響依山郭餘
悲散秋景一作餘聲發秋嶺緘書報此時一作遠景此心方耿耿

寄中書劉舍人

雲霄路竟別中年跡暫同比翼趨丹陛連騎下南宮佳詠邀清月幽
賞滯芳叢迨予一出守與子限西東晨露方愴愴一作蒼離抱更忡
忡忽睹九天詔秉綸歸國工玉座浮香氣秋禁散涼風應向橫門渡
一作旁環珮杳玲瓏光輝恨未矚歸思坐難通蒼蒼松桂姿想在掖
垣中

郡齋感秋寄諸弟

首夏辭舊國窮秋臥滁城方如昨日別忽覺徂歲驚高閣收煙霧池
水晚澄清一作明戶牖已淒爽晨夜感深情昔遊郎署間是月天氣

晴一作清授衣還西郊曉露田中一作野行采菊投酒中昆弟自同
傾簪組聊挂壁焉知有世榮一日居遠郡山川間音形大道庶無累
及茲念已盈

郡中對雨贈元錫兼簡楊凌

宿雨冒空山空城響秋葉沉沉暮色至淒淒涼氣入蕭條林表散的
爍荷上集夜霧着衣重新苔侵履濕遇茲端憂日賴與嘉賓接

冬至夜寄京師諸弟兼懷崔都水

理郡無異一作美政所憂在素食徒令去京國羈旅當歲寒子一作
玄月生一氣陽景極南端已懷時節感更抱別離酸私燕席一作夕
云罷還齋夜方闌邃幕沉空宇一作月孤燭照床單應同茲夕念寧
忘故歲歡川塗恍悠邈涕下一闌干

元日寄諸弟兼呈崔都水

一從守茲郡兩鬢生素髮新正加我年故歲去超忽淮濱益時候了

似仲秋月川谷風景温城池草木發高齋屬多暇怊悵臨芳物日月
味還期念君何時歇

寄職方劉郎中

相聞二十載不得展平生一夕一作旦南宮遇聊用寫中情端服光
朝次羣列慕一作器英聲歸來坐粉闥揮筆乃縱橫始陪文翰遊歡
燕難久并予因謬忝出君爲沉疾嬰別離寒暑過荏苒春草生故園
茲日隔新禽池上鳴郡中永無事歸思徒自盈

社日寄崔都水及諸弟羣屬

山郡多暇日社時放吏歸坐閣獨成悶行塘閱清輝春風動高柳芳
園掩夕扉遙思里中會心緒悵微微

寒食日寄諸弟

禁火曖佳辰念離獨傷抱見此野田花心思杜陵道聯騎定一作竟
何時予今顏已老

三月三日寄諸弟兼懷崔都水

暮節看已謝茲晨愈可惜風澹意傷春池寒花斂夕一作色對酒始
依依懷人還的的誰當曲水行相思尋舊跡

贈李儋侍御

風光山郡少來看廣陵春殘花猶待客莫問意中人

寄楊協律

吏散門閣掩烏鳴山郡中遠念長江別俯覺座隅空舟泊南池雨簾
卷北樓風併罷芳樽燕爲愴昨時同

奉酬滁州寄示

楊凌

淮陽一作南爲郡暇坐惜流芳歇散懷累榭風清暑澄潭月陪燕辭
三楚戒途綿百越非當遠別離雅奏何由發

郡齋贈王卿

無術謬稱簡素淦空自嗟秋齋雨成滯山藥寒始華濩落人皆笑幽

獨歲逾賒唯君出塵意賞愛似山家 一作僧家

簡恒燦

室 一作臺虛多涼氣 一作風天高屬秋時空庭夜風雨草木曉離披
簡書曰云曠文墨誰復持聊因遇澄靜一與道人期

閑居寄諸弟

秋草生庭白露時故園諸弟益相思盡日高齋無一事芭蕉葉上獨
題詩

登樓寄王卿

踏閣攀林恨不同楚雲滄海思無窮數家砧杵秋山下一郡荆榛寒
雨中

寄暢當聞以子弟被召從軍

寇賊起東山英俊方未閑聞君新應募籍籍動京關出身文翰場高
步不可攀青袍未及解白羽插腰間昔爲瓊樹枝 一作姿今有風霜

顏秋郊細柳道走馬一夕還丈夫當爲國破敵如摧山何必事州府
坐使鬢毛班

贈崔員外

一別十年事相逢淮海濱還思洛陽日更話府中人且對清觴滿寧
知白髮新忽忽何處去車馬冒風塵

寄李儋元錫

去年花裏逢君別今日花開已一年世事茫茫難自料春愁黯黯一
作忽忽獨成眠身多疾病思田里邑有流亡愧俸錢聞道欲來相問
訊西樓望月幾迴圓

京師叛亂寄諸弟

弱冠遭世難二紀猶未平羈離官一作守遠郡虎豹滿西京上懷犬
馬戀下有骨肉情歸去在何時流淚忽霑纓憂來上北樓左右但軍
營函谷行人絕淮南春草生烏鳴野田間思憶故園一作里行何當

四海晏甘與齊民耕

贈琮公

山僧一相訪吏案正盈前出處似殊致喧靜兩皆一作依禪暮春華

池宴清夜高齋眠此道本無得寧復有忘筌

寄諸弟建中四年十月三日京師兵亂自滁州間道遣使明

年興元甲子歲五月九日使還作

歲暮兵戈亂京國帛書間道訪存亡還信忽從天上落唯知彼此淚
千行

寄恒燦

心絕去來緣跡一作踵順一作斷人間事獨尋秋草徑夜宿寒山寺

今日郡齋閑思問楞伽字

簡郡中諸生

守郡臥秋閣四面盡荒山此時聽夜雨孤燈照窗間藥園日蕪漫書

帷長自閑惟當上客至論詩一解顏

寄全椒山中道士

今朝郡齋冷忽念山中客澗底束一作采荆薪歸來煑白石欲持一
瓢酒遠慰風雨夕落葉滿空山何處尋行跡慰一作寄滿一作遍

寄釋子良史酒

秋山僧病冷聊寄三五杯應瀉山瓢裏還寄此瓢來

重寄

復寄滿瓢去定見空瓢來若不打瓢破終當費酒材

答釋子良史送酒瓢

此瓢今已到山瓢知已空且飲寒塘水遙將回也同一作遙知回也
風

簡陟巡建三甥盧氏生

忽羨後生連榻話獨依寒燭一齋空時流歡笑事從別把酒吟詩待

爾同

覽襄子臥病一絕聊以題示沈氏生全真

念子抱沉疾霜露變滁城獨此高窗下自然無世情

寄璨師

林院生夜色西廊上紗燈時憶長松下獨坐一山僧

寄盧陟

柳葉遍寒塘曉霜凝高閣累日此留連別來成寂寞

途中寄楊邈裴緒示襄子永陽縣館中作

上宰領淮右下國屬星馳霧野騰曉騎霜竿裂凍旗蕭蕭陟連岡莽

莽望空陂風截鴈嘹唳雲慘樹參差高齋明月夜中庭松桂姿當睽

一酌恨況此兩旬期

宿永陽寄璨律師

遙知郡齋夜凍雪封松竹時有山僧來懸燈獨自宿

雪行寄褻子

浙瀝覆寒騎飄颻暗川容行子郡城曉披雲看杉松

寄裴處士

春風駐遊騎晚景澹山暉一問清冷子獨掩荒園扉草木雨來長里
閭人到稀方從廣陵宴花落未言歸

偶入西齋院示釋子恒燦

僧齋地雖密忘子跡要賒一來非問訊自是看山花

示全真元常元常趙氏生

余辭郡符去爾爲外事牽寧知風雪夜復此對床眠始話南池飲更
詠西樓篇無將一會易歲月坐推遷

寄劉尊師

世間苒苒縈此身長望碧山到無因白鶴徘徊看不去始知下有清

都人

寄廬山樓衣居士

兀兀山行無處歸
山中猛虎識樓衣
俗客欲尋應不遇
雲溪道士見猶稀

因省風俗與從姪成緒遊山水中道先歸寄示

累宵同燕酌
十舍携征騎
始造雙林寂
遐搜洞府秘
羣峰繞盤鬱
懸泉仰特一作時
異陰壑雲松埋
陽崖煙花媚
每慮觀省牽
中乖遊踐志
我尙山水行
子歸棲息地
一操臨流袂
上聳干雲轡
獨往倦危途
懷沖一作州
寡幽致
賴爾還都期
方將登樓遲

寒食寄京師諸弟

雨中禁火空齋冷
江上流鶯獨坐聽
把酒看花想諸弟
杜陵寒食草青青

歲日寄京師諸季端武等

獻歲抱深惻
僑居念歸緣
常患親愛離
始覺世務牽
少事河陽府
晚

守淮南孺平生幾會散已及蹉跎年昨日罷符竹家貧遂留連部曲
多已散車馬不復全閑將酒爲偶默以道自詮聽松南巖寺見月西
澗泉爲政無異術當責豈望遷終理一作裏來時裝歸鑿杜陵田

簡盧陟

可憐白雪曲未遇知音人恓惶戎旅下蹉跎淮海濱澗樹含朝雨山
鳥哢餘春我有一瓢酒可以慰風塵

西澗卽事示盧陟

寢扉臨碧澗晨起澹忘情空林細雨至圓文遍水生永日無餘事山
中伐木聲知子塵喧久暫可散煩纓

登郡樓寄京師諸季淮南子弟

始罷永陽守復臥潯陽樓懸檻飄寒雨危堞侵一作浸江流迨茲聞
鴈夜重憶別離秋徒有盈樽酒鎮此百端憂

寄黃尊師

結茅種杏在雲端掃雪焚香宿石壇靈祇不許世人到忽作雷風登嶺難

寄黃劉二尊師

廬山兩道士各在一峯居矯掌白雲表晞髮陽和初清夜降真侶焚香滿空虛一作廬中有無爲樂自然與世疎道尊不可屈符守豈暇餘高齋遙致敬願示一編書

秋夜寄丘二十二員外

懷君屬秋夜散步詠涼天山空松子落幽人應未眠

奉酬寄示

丘丹

露滴梧葉鳴風秋桂花發中有學仙侶吹簫弄山月

贈丘員外二首

高詞棄浮靡貞行表鄉閭未真南宮拜聊偃東山居大藩本多事日與文章疎每一覩之子高詠遂起予宵晝方連燕煩惱亦頓祛格言

雅誨闕善謔矜數餘久跼思遊曠窮慘遇陽舒虎丘愜登眺吳門悵
躊躇方此戀攜手豈云還舊墟告諸吳子弟文學爲何如

跡與孤雲遠心將野鶴俱那同石氏子每到府門趨

奉訓

丘丹

久作煙霞侶蹙將簪組親還同褚伯玉入館忝州人

贈李判官

良玉定爲寶長材時所希佐幕方巡郡奏命布恩威食蔬程獨守飲
冰節靡違決獄興邦頌高文稟天機賓館在林表望山啓西扉下有
千畝田泱泱吳土肥始耕已見穫衿袵今授衣政拙勞詳省淹留未
得歸雖慚且忻願日夕覩光輝

寄皎然上人

吳興老釋子野雪蓋精廬詩名徒自振道心長晏如想茲棲禪夜見
月東峰初鳴鍾一作磬驚巖壑焚香滿空虛叨慕端成舊未識豈爲

疎願以碧雲思方君恕別餘茂苑文華地流水古僧居何當一遊詠
倚閣吟躊躇

贈舊識

少年遊太學負氣蔑諸生蹉跎三十載今日海隅行

復理西齋寄丘員外

前歲理西齋得與君子同迨茲已一周悵望臨春風始自疎林竹還
復長榛藂端正良難久蕪穢易爲功援斧開衆鬱如師啓羣蒙庭宇
還清曠煩抱亦舒通海隅雨雪霽春序風景融時物方如故懷賢思
無窮

和張舍人夜直中書寄吏部劉員外

西垣草詔罷南宮憶上才月臨蘭殿出涼自鳳池來松桂生丹禁鴛
鷺集雲臺託身各有所相望徒徘徊

和李二主簿寄淮上綦母三

滿城憐傲吏終日賦新詩請去聲報淮陰客春帆浪作音佐期

寄二巖士良婺牧 士元郴牧

絲竹久已懶今日遇君忭打破蜘蛛千道網總爲鵲鴿兩箇巖

韋蘇州集卷第三

韋蘇州集卷第四

蘇州刺史韋 應物

送別六十六首

李五席送李主簿歸西臺一首

送崔押衙相州一首

送宣城路錄事一首

送李十四山人東遊一首

送李二歸楚州一首

送闍黎赴東川辟一首

送令狐岫宰恩陽一首

送馮著受李廣州署爲錄事一首

送元倉曹歸廣陵一首

送唐明府赴溧水一首

喜於廣陵拜覲家兄奉送還池州一首

送章八元秀才擢第往上都應制一首

送張侍御祕書江左覲省一首

賦得鼎門送盧耿赴任一首

賦得浮雲起離色送鄭述誠一首

餞雍聿之潞州謁李中丞一首

上東門會送李幼舉南游徐方一首

送洛陽韓丞東遊一首

送鄭長源一首

送李儋一首

賦得暮雨送李渭士曹一首

留別洛京親友一首

賦得沙際路送從叔象一首

蘇州刺史章

謝

送榆次林明府一首

雜言送黎六郎一首

天長寺上方別子西有道一首

送黎六郎少府赴陽翟一首

送別覃孝廉一首

送開封盧少府一首

送槐廣落第歸揚州一首

送汾城王主簿一首

送澠池崔主簿一首

送顏司議使蜀訪圖書一首

奉送從兄宰晉陵一首

贈別河南李功曹一首

送五經趙隨登科授廣德尉一首

宴別幼遐與君貺兄弟一首

送宣州周錄事一首

謝櫟陽令歸西郊贈別諸友生一首

送季端東行一首

送姚係還河中一首

始除尚書郎別善福精舍一首

送常侍御魯却使西蕃一首

送郗詹事一首

送蘇評事一首

送李益侍御赴幽州幕一首

自尚書郎出爲滁州刺史留別友朋兼示諸弟一首

送元錫楊凌一首

別楊氏女一首

別中第一首 一云送崔肅懿

寄別李儋一首

送倉部蕭員外院長存一首

送王校書一首

送丘員外還山一首 丘詩附

重送丘二十二還臨平山居一首 丘詩附

送鄭端公第移院常州一首

送房杭州一首

送陸侍御還越一首

聽江笛送陸侍御一首 丘詩附

送丘員外歸山居一首

送崔叔清遊越一首

送雲陽鄒儒立少府侍奉還京師一首

送豆盧策秀才一首

送王卿一首

送劉評事一首

送雷監赴闕庭一首

送秦系赴潤州一首

送別

李五席送李主簿歸西臺

請告嚴程盡西歸
道路寒欲陪鷹隼
集猶戀鶴鴒單
洛邑人全少
嵩高雪尚殘
滿臺誰不故
報我在微官

送崔押衙相州頃任內黃令

禮樂儒家子
英豪燕趙風
驅鷄嘗理邑
走馬却從戎
白刃千夫闢
黃金四海同
嫖姚恩顧下
諸將指揮中
別路憐芳草
歸心伴塞鴻
鄴城新騎滿
魏帝舊臺空
望闕應懷戀
遭時貴立功
萬方如已靜
何處欲

翰忠

送宣城路錄事

江上宣城郡孤舟遠到時
雲林謝家宅山水敬亭祠
綱紀多閑日觀遊得賦詩
都門且盡醉此別數年期

送李十四山東遊

一作山人東遊

聖朝有遺逸披膽謁至尊
豈是買榮寵誓將救元元
權豪非所便書奏寢禁門
高歌長安酒忠憤不可吞
歛來客河洛日與靜者論
濟世翻小事丹砂駐精魂
東遊無復繫梁楚多大蕃
高論動侯伯疎懷脫塵喧
送君都門野飲我林中
樽立馬望東道白雲滿
梁園踟躕欲何贈空是平生言

送李二歸楚州

時李季弟牧楚州被訟赴急

情人南楚別復詠在原詩
忽此嗟歧路還令泣素絲
風波朝夕遠音信往來遲
好去扁舟客青雲何處期

送閻采赴東川辟

冰炭俱可懷孰云熱與寒何如結髮友不得攜手懽晨登嚴霜野送子天一端祇承簡書命俯仰豸角冠上陟白雲嶠下冥玄壑湍離羣自有託歷險得所安當念反窮巷登朝成慨嘆

送令狐岫宰恩陽

大雪天地閉羣山夜來晴居家猶苦寒子有千里行行行安得辭荷此蒲璧榮賢豪爭追攀飲錢出西京罇酒豈不懽暮春自有程離人起視日僕御促前征倭遲歲已窮當造巴子城和風被草木江水日夜清從來知善政離別慰友生

送馮著受李廣州署爲錄事

鬱鬱楊柳枝蕭蕭征馬悲送君灞陵岸糾郡南海湄名在翰墨場羣公正追隨如何從此去千里萬里期大海吞東南橫嶺隔地維建邦臨日域温煥御四時百國共臻湊珍奇獻京師富豪虞興戎繩墨不

易持州伯荷天寵一作龍選還當翊丹墀子爲門下生終始豈見遺
所願酌貪泉心不爲磷緇上將翫國士下以報渴飢

送元倉曹歸廣陵

官閑得去住告別戀音徽一作輝舊國應無業他鄉到是歸楚山明
月滿淮甸夜鍾微何處孤舟泊遙遙心曲違

送唐明府赴溧水三任縣事

三爲百里宰已過十餘年祇歎官如舊旋聞邑屢遷魚鹽濱海利薑
蔗傍湖田到此安吐俗琴堂又晏然

喜於廣陵拜覲家兄奉送發還池州

青青連枝樹苒苒久別離客遊廣陵中俱到若有期俯仰敘存歿哀
腸發酸悲收情且爲歡累日不知飢夙駕多所迫復當還歸池長安
三千里歲晏獨何爲南出登閩門驚飈左右吹所別諒非遠要令心
不怡

送章八元秀才擢第往上都應制

決勝文場戰已酣，行應辟命復才堪。
旅食不辭遊闕下，春衣未換報江南。
天邊宿鳥生歸思，關外晴山滿夕嵐。
立馬欲從何處別，都門楊柳正毵毵。

送張侍御祕書江左覲省

莫歎都門路歸無，駟馬車繡衣猶在篋。
芸一作蓬閣已觀書，沃野收紅稻。
長江釣白魚，晨飡亦可薦。
名利欲何如，薦一作潔。

賦得鼎門送盧耿赴任

名因定鼎地，門對鑿龍山水北。
樓臺近城南，車馬還稍開。
芳野靜欲掩，暮鍾閑去此。
無嗟屈前賢，尙抱關。

賦得浮雲起離色送鄭述誠

遊子欲言去，浮雲那得知。
偏能見行色，自是獨傷離。
晚帶城遙暗，秋生峯尙奇。
還因朔吹斷，疋馬與相隨。

錢雍聿之潞州謁李中丞

鬱鬱兩相遇出門草青青酒酣拔劍舞慷慨送子行驅馬涉大河日
暮懷洛京前登太行路志士亦未平薄遊五府都高步振英聲主人
才且賢重士百金輕絲竹促飛觴夜醺達晨星娛樂易淹暮諒在執
高情

上東門會送李幼舉南遊徐方

離絃旣罷彈罇酒亦已闌聽我歌一曲南徐在雲端雲端雖云邈行
路本非難諸侯皆愛才公子遠結歡濟濟都門宴將去復盤桓令姿
何昂昂良馬遠遊冠意氣且爲別由來非所嘆

送洛陽韓丞東遊

仙鳥何飄颻綠衣翠爲襟顧我差池羽咬咬懷好音徘徊洛陽中游
戲清川潯神交不在結歡愛自中心駕言忽徂征雲路邈且深朝遊
尙同啄夕息當異林出錢宿東郊列筵屬城陰舉酒欲爲樂憂懷方

沉沉

送鄭長源

少年一相見一作得飛轡河洛間歡遊不知罷中路忽言還泠泠鷗
絃哀悄悄冬夜閑丈夫雖耿介遠別多苦顏君行拜高堂速駕難久
攀雞鳴儔侶發朔雪滿河關須臾在今夕罇酌且循環

送李儋

別離何從生乃在親愛中反念行路子拂衣自西東日昃不留宴嚴
車出崇墉行遊一作役非所樂端憂道未通一作端處道未豐春野

百卉發清川思無窮芳時坐離散世事誰可同歸當掩重關默默想
音容

賦得暮雨送李胄一作渭

楚江微雨裏建業暮鍾時漠漠帆來重冥冥鳥去遲海門深不見浦
樹遠含滋相送情無恨沾襟比散絲

留別洛京親友

握手出都門，駕言適京師。豈不懷舊廬，惆悵與子辭。
麗日坐高閣，清觴醺華池。昨遊倏已過，後遇良未知。
念結路方永，歲陰野無暉。單車我當前，
一作去暮雪子獨歸臨流 二云漸遙 一相望零淚，忽沾衣。

賦得沙際路送從叔象

獨樹沙邊人跡稀，欲行愁遠暮鍾時。
野泉幾處侵應盡，不遇山僧知問誰。

送榆次林明府

無嗟千里遠，亦是宰王畿。策馬雨中去，逢人關外稀。
邑傳榆石在，路繞晉山微。別思方蕭索，新秋一葉飛。

雜言送黎六郎 壽陽公之子

冰壺見底未爲清，少年如玉有詩名。
聞話嵩峯多野寺，不嫌黃綬向陽城。
朱門嚴訓朝辭去，騎出東郊滿飛絮。
河南庭下拜府君，陽城歸

路山氲氲山氲氲常不見釣臺水淥荷已生少姨廟寒花始徧縣閑
吏傲與塵隔移竹疏泉常岸幘莫言去作折腰官豈似長安折腰客
天長寺上方別子西有道時任京兆府功曹攝高陵宰別田
曹盧康戶曹韓質因而有作

假邑非拙素况乃別伊人聊登釋氏居攜手戀一作念茲晨高曠出
塵表逍遙滌心神青山對芳苑列樹遶一作盈通津車馬無時絕行
子倦風塵今當遵往路佇立何由申維持貞白志以慰心所親

送黎六郎赴陽翟少府

試吏向嵩陽春山躑躅芳腰垂新綬色衣滿舊芸香喬樹別時綠客
程關外長祗應傳善政日夕慰高堂

送別覃孝廉

思親自當去不第未蹉跎家住青山下門前芳草一作流水多秭歸
通遠徼巫峽注驚波州舉年年事還期復幾何

送開封盧少府

雄藩車馬地作尉有光輝滿席賓常待闐街燭夜歸關河征旆遠煙
樹夕陽微到處無留滯梁園花欲稀

送槐廣落第歸揚州

下第常稱屈少年心獨輕拜親歸海畔似舅得詩名晚對青山別遙
尋芳草行還期應不遠寒露濕蕪城

送汾城王主簿

少年初帶印汾上又經過芳草歸時徧情人故郡多禁鍾春雨細宮
樹野煙和相望東橋別微風起夕波

送灑池崔主簿

邑帶洛陽道年年應此行當時匹馬客今日縣人迎暮雨投關郡春
風別帝城東西殊不遠朝夕待佳聲

送顏司議使蜀訪圖書

輶駕一封急一作傳蜀門千嶺曛詎分江轉字但見路緣雲山館夜
聽雨秋猿獨叫羣無爲久留滯聖主待遺文

奉送從兄宰晉陵

東郊暮草歇千里夏雲生立馬愁將夕看山獨送行
依微吳苑樹迢遞晉陵城慰此斷行別邑人多頌聲

贈別河南李功曹宏辭登科拜官

耿耿抱私戚寥寥獨掩扉臨觴自不飲况與故人違
故人方琢磨朗代所稀憲禮更右職文翰灑天機
聿一作竭來自東山羣彥仰餘輝談笑取高第
縮綬卽言歸洛都遊燕地千里及芳菲今朝章臺別
楊柳亦依依雲霞未改色山川猶夕暉忽復不相見
心思亂霏霏

送五經趙隨登科授廣德尉

明經有清秩當在石渠中獨往宣城郡高齋謁謝公
寒原正蕪漫一作沒夕鳥自西東秋日不堪別淒淒多朔風

宴別幼遐與君貺兄弟

乖闕一作乖闕意方一作云弭安知忽來翔累日重歡宴一日復離

傷置酒慰茲夕秉燭坐華堂契闊未及展晨星出東方征人慘已辭

車馬儼成一作來裝我懷自無歡原野滿春光一作芳羣水含時澤

野雉鳴朝陽平生有壯志不覺淚霑裳况自守空宇日夕但彷徨

送宣州周錄事

清時重儒士糾郡屬伊人薄遊長安中始得一交親英豪若雲集餞
別塞城闐高駕臨長路日夕起風塵方念清宵宴已度芳林春從茲
一分手緬邈吳與秦但覩年運駛安知後會因唯當存令德可以解
惰勤

謝櫟陽令歸西郊贈別諸友生

結髮仕一作事州縣蹉跎在文墨徒有排雲心何由主羽翼幸遭明

盛日萬物蒙生植獨此抱微痾頽然謝斯職大歷十四年六月二十

三日自鄂縣制除櫟陽令以疾辭歸善福精舍七月二十日賦此詩
世道方荏苒郊園思偃息爲歡日已延君子情未極馳觴一作驅馳
忽云晏高論良難測遊步清都宮迎風嘉樹側晨起西郊道原野分
黍稷自樂陶唐人服勤在微力佇君列丹陛出處兩爲得

送端東行

世承清白遺一作世事留清白躬服古人言從宦俱守道歸來共閉
門驅車何處去暮雪滿平原

送姚孫還河中孫一作系

上國旅遊罷故國生事微風塵滿路起行人何處歸留思芳樹飲惜
別暮春暉幾日投關郡河山對掩扉

始除尚書郎別善福精舍建中二年四月十九日自前櫟陽
令除尚書比部員外郎

簡略非世器委身同草木逍遙精舍居飲酒自爲足累日曾一櫛對

書常懶讀社臘會高年山川恣遊矚明世方選士中朝懸美祿除書
忽到門冠帶便拘束愧忝郎署跡謬蒙君子錄俯仰垂華纓飄颻翔
輕轂行將親愛別戀此西澗曲遠峯明夕川夏雨生衆綠迅風飄野
路一作吹往路迴首不遑宿明晨下煙閣白雲在幽谷

送常侍御却使西蕃

歸奏聖朝行萬里却銜天詔報蕃臣本是諸生守文墨今將匹馬靜
煙塵旅宿關河逢暮雨春耕亭鄣識遺民此去多應收故地寧辭沙
塞往來頻

送郝詹事

聖朝列羣彥穆穆佐休明君子獨知止懸車守國程忠良信舊德文
學播英聲既獲天爵美况將齒位并書奏蒙省察命駕乃東征皇恩
賜印綬歸爲田里榮朝野同稱嘆園綺鬱齊名長衢軒蓋集飲餞出
西京時屬春陽節草木已含英洛川當盛宴斯焉爲達生

送蘇評事

季弟仕譙都元兄坐蘭省言訪始忻忻念離當耿耿嵯峨夏雲起迢
遰山川永登高望去塵紛思終難整一作罄

送李侍御益赴幽州幕

二十揮篇翰二十窮典墳辟書五府至名爲四海聞始從車騎幕今
赴嫖姚軍契闊晚相遇草感遽離羣悠悠行子遠眇眇川塗分登高
望燕代日夕生夏雲司徒擁精甲誓將除國氛儒生幸持斧可以佐
功勳無言羽書急坐闕相思文

自尙書郎出爲滁州刺史留別朋友兼示諸弟

少年不遠仕秉笏東西京中歲守淮郡奉命乃征行素慙省閣姿况
忝符竹榮効愚方此始顧私豈獲并徘徊親交戀愴恨昆友情日暮
風雪起我去子還城登塗建隼旗勒駕望承明雲臺煥中天龍闕鬱
上征晨興奉早朝玉露霑華纓一朝從此去服膺理庶吐皇恩儻歲

月歸復廁羣英

送元錫楊凌

荒林翳山郭積水成秋晦端居意自違
況別親與愛歡筵慊未足離
燈悄已對還當掩郡閣佇君方此會

送楊氏女

永日方感感出門復悠悠女子今有行
大江沂輕舟爾輩況無恃撫
念益慈柔幼爲長所育幼女爲楊氏所撫育
兩別泣不休對此結中
腸義往難復留自小闕內訓言早無恃
事姑貽我憂賴茲託令門仁
恤庶無尤貧儉誠所尙資從豈待一作在周孝恭遵婦道容止順其
猷別離在今晨見爾當何秋居閑始自遣
臨感忽難收歸來視幼女
零淚緣纓流

送中弟一二云送崔肅懿

秋風一作氣入疎戶離人起晨朝
山郡多風雨西樓更蕭條嗟予淮

海老送子關河遙同來不同去沉憂寧復消

寄別李儋

首戴惠文冠心有決勝籌翩翩四五騎結束向并州名在相公幕一
作府丘山恩未酬妻子不及顧親友安得留宿昔同文翰交分共綢
繆忽枉別離札涕淚一交流遠郡臥殘疾一作雨涼氣滿西樓想子
臨長路時當淮海秋

送倉部蕭員外院長存

僕被蹉跎老江國情人邂逅此相逢不隨鴛鴦朝天去遙想蓬萊臺
閣重

送王校書

同宿高齋換時節共看移石復栽杉送君江浦已惆悵更上西樓望
遠帆

送丘員外還山

長棲白雲表，覲訪高齋宿。還辭郡邑，誼歸泛松江。淥結茅隱蒼嶺，伐薪響深谷。同是山中人，不知往來躅。靈芝非庭草，遼鶴委一作匪池。驚終當署里門，一表高陽族。

奉酬使君送歸山之作

丘丹

側聞郡守至，偶乘黃犢出。不別桃源人，一見經累日。蟬鳴念秋稼，蘭酌動離瑟。臨水降麾幢，野艇纔容膝。參差碧山路，日一作月送江帆。疾涉海得驪珠，棲梧慙鳳質。媿非鄭公里，歸掃蒙籠室。

重送丘二十一還臨平山居

歲中始再覲，方來又解攜。纔留野艇語，已憶故山棲。幽澗人夜汲，深林鳥長啼。還持郡齋酒，慰子一作此霜露淒。

奉酬重送歸山

丘丹

賣藥有時至，自知往來疎。遽辭池上酌，新得山中書。步出芙蓉府，歸乘鰲鯨車。猥蒙招隱作，豈媿班生廬。

送鄭端公弟移院常州

時瞻憲臣重禮爲內兄全公程儻見責私愛信不憊況昔陪朝列今
茲俱海壖清觴方共酌一作笑燕天書忽告遷豈徒咫尺地使我心
思綿應當自此始歸拜雲臺前

送房杭州孺復

專城未四十暫謫豈蹉跎風雨吳門夜惻愴別情多

送陸侍御還越

居藩久不樂遇子聊一欣英聲頗籍甚交辟迺時珍繡衣過舊里驄
馬輝四鄰一作輝光耀四鄰敬恭尊郡守牋簡具州民謬忝誠所媿
思懷方見申置榻宿清夜加邊醮良辰遵塗還盛府行舫遶長津自
有賢方伯得此文翰寶

聽江笛送陸侍御同上員外賦題

遠聽江上笛臨觴一送君還愁獨宿夜更向郡齋聞

同前

丘丹

離樽聞夜笛寥亮入寒城月落車馬散悽惻主人情

送丘員外歸山居

郡閣始嘉宴青山憶舊居爲君量革履且願住籃輿

送崔叔清遊越

忘茲適越意愛我郡齋幽野情豈好謁詩興一相留遠水帶寒樹闐門望去舟方伯憐文士無爲成滯遊

送雲陽鄒儒立少府侍奉還京師

建中卽藩守天寶爲侍臣歷觀兩都士多閱諸侯人鄒生乃後來英俊亦罕倫爲文頗瓌麗秉度自貞醇甲科推令名延閣播芳塵再命趨王畿請告奉慈親一鍾信榮祿可以展歡欣昆弟俱時秀長衢當自伸聊從郡閣暇美此時景新方將極娛宴已復及離辰一云蕪後乃離辰一作蕪後省署慙再入江海綿十春今日闔門路握手子歸

秦

送豆盧策秀才

歲交冰未泮一作冰始泮又作冰水泮地卑海氣昏
 子有京師遊始發吳闐門新黃含遠林微綠生
 陳根詩人感時節行道當憂煩古來
 濩落者俱不事田園文如金石韻豈乏知音
 言方辭郡齋榻為一作已酌離亭罇無為倦
 羈旅一去高飛翻

送王卿

別酌春林啼鳥稀雙旌背日晚風吹却憶
 回來花已盡東郊立馬望城池

送劉評事

聲華滿京洛藻翰發陽春未遂鸚鵡舉尚為
 江海賓吳中高宴罷西上一遊秦已想函關
 道遊子冒風塵籠禽羨歸翼遠守懷交親況
 復歲云暮凜凜冰霜辰旭霽開郡閣寵餞集
 文人洞庭摘朱實松江獻

白鱗丈夫豈恨別一酌且歡忻

送雷監赴闕庭

才大無不備出入爲時須雄藩精理行祕府擢文儒詔書忽已至焉
得久踟躕方舟趁朝謁觀者盈路衢廣筵列衆賓送爵無停迂攀餞
誠愴恨一作恨賀榮且歡娛長陪柏梁宴日向丹墀趨時方重右職
蹉跎獨海隅

送秦系赴潤州

近作新婚鑷白髻長懷舊卷映藍衫更欲攜君虎丘寺不知方伯望
征帆

韋蘇州集卷第四

豆蔻林美香露四

...

...

...

...

對秦宋世韻休

...

...

...

...

參雷雷使關致

...

韋蘇州集卷第五

蘇州刺史韋 應物

訓答五十六首

期盧嵩枉書稱日暮無馬不赴以詩答一首

任洛陽丞答長安田少府問一首

假中枉盧二十二書示稱臥疾兼訝李二久不訪問以詩答

書因以戲李二一首

訓盧嵩秋夜見寄五韻一首

訓鄭戶曹驪山感懷一首

答李澣二首

酬柳中郎春日歸揚州南郭見別之作一首

酬豆盧倉曹題庫壁見示一首

酬李儋一首

酬元偉過洛都夜燕一首

酬韓質舟行阻凍一首

李博士弟以余罷官居同德精舍共有伊陸各山之期久而

未去枉詩見問中云宋生昔登覽末云那能顧蓬華直書

鄙懷聊以為答一首

酬李博士永寧主簿叔廳見待一首

答令狐工曹獨孤兵曹聯騎暮歸望山見寄一首

答李博士一首

答劉西曹一首

答貢士黎逢一首

答韓庫部協一首

答崔主簿倬一首

答徐秀才一首

答東林道士一首

答長寧令楊轍一首

答馮魯秀才一首

答崔主簿問兼簡溫上人一首

清都觀答幼遐一首

善福精舍答韓司錄清都觀會宴見憶一首

答長安丞裴稅一首

奉酬處士叔見示一首

答庫部韓郎中一首

答楊校書當一首

答崔都水一首

酬令狐司錄善福精舍見贈一首

灋上精舍答趙氏外生伉一首

答趙氏生伉一首

答端一首

答史館張學士同柳庶子學士招於集賢院看花見寄兼呈

柳庶子一首

答王郎中一首

答崔都水一首

答王卿送別一首

答裴丞說歸京所獻一首

答裴處士一首

答楊奉禮一首

答端一首

答僮奴重陽二甥一首

答重陽一首

酬劉侍郎使君一首劉詩附

答令狐侍郎一首令狐詩附

酬張協律一首

答秦十四校書一首秦詩附

答賓一首

答鄭騎曹青橘絕句一首

奉和聖製重陽日賜宴一首

和吳舍人早春歸沐西亭言志一首

奉和張大夫戲示青山郎一首

答河南李士巽題香山寺一首

答故人見諭一首

訓閹員外陟一首

逢遇七首

長安遇馮著一首

將發楚州經寶應縣訪李二忽於州館相遇月夜書情因簡

李寶應一首

廣陵遇孟九雲卿一首

淮上遇洛陽李主簿一首

路逢崔元二侍御避馬見招因以詩戲贈一首

逢楊開府一首

休假日訪王侍御不遇一首

因省風俗訪道士姪不見題壁一首

訓答

期盧嵩枉書稱日暮無馬不赴以詩答

佳期不可失終願枉衡門南陌人猶度西林日未昏庭前空倚杖花
裏獨留罇莫道無來駕知君有短轅

任洛陽丞答前長安田少府問

相逢且對酒相問欲何如
數歲猶卑吏家人笑著書
告歸應一作今未得榮宦又知疎
日日生春草空令憶舊居

假中枉盧二十二書示稱臥疾兼訝李二久不訪問以詩答書因以戲李二

微官何事勞趨走服藥閑眠養不才
花裏碁盤憎鳥汙枕邊書卷訝風開
故人問訊緣同病芳月相思阻一盃
應笑王戎成俗物遙持麈尾獨徘徊

訓盧嵩秋夜見寄五韻

喬木生夜涼月華滿前墀去君咫尺地
勞君千里一作萬思素秉棲遁志
况貽招隱詩坐見林木榮一云坐損經濟策
願赴滄洲期能待歲晏攜手當此時

訓鄭戶曹驪山感懷

蒼山何鬱盤飛閣凌上清先帝昔好道下元朝百靈白雲已蕭條麋鹿但縱橫泉水今尚暖舊林亦青青我念綺襦歲扈從當太平小臣職前驅馳道出灞亭翻翻日月旗殷殷鞶鼓聲萬馬自騰驤八駿案轡行日出煙嶠綠氤氳麗層甍登臨起遐想沐浴懽聖情朝燕詠無事時豐賀國禎日和絃管音下使萬室聽海內湊朝貢賢愚共勸榮合沓車馬喧西聞長安城事往世如寄感深迹所經申章報蘭藻一望雙涕零

答李漣三首

孤客逢春暮緘情寄舊遊海隅人使遠書到洛陽秋
馬卿猶有壁漁父自無家想子今何處扁舟隱菽花
林中觀易罷溪上對鷗閑楚俗饒辭客何人最往還

訓柳郎中春日歸揚州南郭見別之作

廣陵二月花正開花裏逢君醉一迴南北相過殊不遠暮潮從去早

潮來

酬豆盧倉曹題庫壁見示

掾局勞才子新詩動洛川
運籌知決勝聚米似論邊
宴罷常分騎晨趨又比肩
莫嗟年鬢改郎署定推先

酬李儋

開門臨廣陌旭日車駕喧
不見同心友徘徊憂且煩
都城二十里居在良與坤
人生所各務乖闊累朝昏
湛湛罇中酒青青芳樹園
緘情未及發先此枉瓊璠
邁世超一作躡高躅尋流得真源
明當策疲馬與子同笑言

酬元偉過洛陽夜燕

三載寄關東所懽皆遠違
思懷方耿耿忽得覲容輝
親燕在良夜歡攜闈中闈
問我猶杜門不能奮高飛
明燈照四隅炎炭正可依
清觴雖云酌所媿乏珍肥
晨裝復當行寥落星已稀
何以慰心曲佇子西

還歸

訓韓質舟行阻凍

晨坐枉嘉藻持此慰寢興中獲辛苦奏長河結陰冰皓曜羣玉發淒
清孤景凝一作澄至柔反成堅造化安可恆方舟未得行鑿飲空兢
兢苦寒彌時節待泮豈所能何必涉廣川荒衢且升騰殷勤宣中意
庶用達吾朋

李博士弟以余罷官居同德精舍共有伊陸名山之期久而
未去枉詩見問中云宋生昔登覽末云邗能顧蓬華直寄鄙
懷聊以爲答

初夏息衆緣雙林對禪客枉茲芳蘭藻促我幽人策冥搜企前哲逸
句陳往迹髣髴陸渾南迢遞千峯碧從來遲高駕自顧無物役山水
心所娛如何更朝夕晨興涉清洛訪子高陽宅莫言往來疎駑馬知
阡陌

寄訓李博士永寧主簿叔廳見待

解鞅先幾日款曲見新詩定向公堂醉遙憐獨去時
葉霑寒雨落鍾度遠山遲晨策已云整當同林下期

答令狐士曹獨孤兵曹聯騎暮歸望山見寄

共愛青山住近南行牽吏役背雙驂枉書獨宿對流水
遙羨歸時滿夕嵐

答李博士

休沐去人遠高齋出林杪晴山多碧峯顥氣凝秋曉
端居喜良友枉使千里路緘書當夏時開緘時已度
簷鷓已颿颺荷露方蕭颯夢遠竹窗幽行稀蘭徑合
舊居共南北往來只如昨問君今爲誰日夕度清洛

答劉西曹時爲京兆功曹

公館夜云寂微涼羣樹秋西曹得時彥華月共淹留
長嘯舉清觴志

氣誰與儔千齡事雖邈俯念忽已周篇翰如雲興京洛頗優遊詮文不獨占理妙即同流淺劣見推許恐為識者尤空慙文璧贈日夕不能酬夕一作交

答貢士黎逢時任京兆功曹

茂等一作才方上達諸生安可希栖神澹物表渙汗布令詞如彼岷山玉本自有光輝鄙人徒區區稱歎亦何為彌月曠不接公門但一作役驅馳蘭章忽有贈持用慰所思不見心尚密一作微密況當相見時

答韓庫部協

良玉表貞度麗藻頗為工名列金閨籍心與素士同日晏下朝來車馬自生風清宵有佳興皓月直南宮矯翮方上征顧我邈忡忡豈不願攀舉執事府庭中智乖時亦蹇才大命有一作為通還當以道推解組守蒿蓬

答崔主簿倬

朗月分林靄遙管動離聲故驩良已阻空宇澹無情窈窕雲鴈沒蒼
茫河漢橫蘭章不可答沖襟徒自盈

答徐秀才

鉛鈍謝貞器時秀猥見稱豈如白玉仙一作仙山鶴方與紫霞升清
詩舞豔雪孤抱瑩玄冰一枝非所貴懷書思一作且武陵一云懷書

且茂陵

答東林道士

紫閣西邊第幾峯茅齋夜雪虎行蹤遙看黛色知何處欲出山門尋
暮鍾一作欲向西山尋暮鍾

答長寧令楊轍

皓月升林表公堂滿清輝嘉賓自遠至觴飲夜何其宰邑視京縣歸
來無寸資瓌文溢衆寶雅正得吾師廣川含澄瀾茂一作芳樹擢華

滋短才何足數枉贈媿妍詞歡眄良見屬素懷亦已披何意雲栖翰
不嫌蓬艾卑但恐河漢沒回車首路歧

答馮魯秀才

農坐枉瓊藻知子返中林澹然山景晏泉谷響幽禽髣髴謝塵迹逍
遙舒道心顧我腰間綬端爲華髮侵簿書勞應對篇翰曠不尋薄田
失鋤耨生苗安可任徒令慙所問想望東山岑

答崔主簿問兼簡溫上人

緣情生衆累晚悟依道流諸境一已寂了將身世浮閑居澹無味忽
復四時周靡靡芳草積稍稍新篁抽卽此抱餘素塊然誠寡儔自適
一忻意愧蒙君子憂

清都觀答幼遐

逍遙仙家子日夕朝玉皇興高清露沒渴飲瓊華漿解組一來款披
衣拂天香粲然顧我笑綠簡發新章泠泠如玉音一作響馥馥若蘭

芳浩意坐盈此月華殊未央却念誼譁日何由得清涼疎松抗一作
枕高殿密竹陰長廊榮名等糞土攜手隨風翔

善福精舍答韓司錄清都觀會宴見憶

弱志厭衆紛抱素寄精廬皦皦仰時彥悶悶平聲獨爲愚之子亦辭
秩高蹤罷馳驅忽因西飛禽贈我以瓊琚始表仙都集復言歡樂殊
人生各有因契闊不獲俱一來田野中日與人事疎水木澄秋景逍
遙清賞餘枉駕懷前諾引領豈斯須一作須臾無爲便高翔邈矣不
可迂

答長安丞裴稅

出身忝時士於世本爲機爰以林壑趣遂成頑鈍姿臨流意已淒采
菊露未稀舉頭見秋山萬事都若遺獨踐幽人蹤邈將親友違髦士
佐京邑懷念枉貞詞久雨積幽抱清罇宴良知從容操劇務文翰方
見推安能戢羽翼顧此林栖時

奉訓處士叔見示

挂纓守貧賤積雪臥郊園叔父親降趾壺觴攜到門高齋樂燕罷清
夜道心存卽此同疎氏可以一忘言

答庫部韓郎中

高士不羈世頗將榮辱齊適委華冕去欲還幽林栖雖懷承明戀忻
與物累睽逍遙觀運流誰復識端倪而我豈高一作能致偃息平門
西愚者世所遺沮溺共耕犁風雪積深夜園田掩荒蹊幸蒙相思札
款曲期見攜

答楊校書當

偶然弃官去投跡在田中日出照茅屋園林一作種園養愚蒙雖云
無一資罇酌會不空且忻百穀成仰歎造化功出入與民伍作事靡
不同時伐南澗竹夜還灑水東貧蹇自成退豈爲高人蹤覽君金玉
篇彩色發我容一作蒙日日欲爲報方一作歷春已徂冬

答崔都水

深夜竹庭雪孤燈案上書不遇無爲化一作法誰復得閑居

酬令狐司錄善福精舍見贈

野寺望山雪空齋對竹林我以養愚地生君道者心

灋上精舍答趙氏外生伉

遠跡出塵表寓身雙樹林如何小子伉一作弟亦有超世心擔書從
我遊攜手廣川陰雲開夏郊綠景晏青山沉對榻遇清夜獻詩合一
作全雅音所推苟禮數於性道豈深隱拙在沖默經世昧古今無爲
率爾言可以致華簪

答趙氏生伉

暫與雲林別忽陪鴛鷺翔看山不得去知爾獨相望

答端

郊園夏雨歇閑院綠陰生職事方無効幽賞獨違情物色坐如見離

抱悵多盈況感夕涼氣聞此亂蟬鳴

答史館張學士同柳庶子學士集賢院看花見寄兼呈柳學

士

班楊秉文史對院自爲隣餘香掩閣去遲日看花頻似雪飄闐闐從
風點近臣南宮有芳樹不並禁垣春

答王郎中

臥閣枉芳藻覽旨悵秋晨守郡猶羈寓無以慰嘉賓野曠歸雲盡天
清曉露新池荷涼已至窗梧落漸頻風物殊京國邑里但荒榛賦繁
屬軍興政拙媿斯人髦士久臺閣中路一漂淪歸當列盛朝一作明
豈念臥淮濱

答崔都水

亭亭心中人迢迢居秦關常緘素札去一作問適枉華章還憶在灋
郊時攜手望秋山久嫌官府勞初喜罷秩閑終年不事業寢食長慵

頑不知爲時來一作何爲來名籍挂郎間攝衣辭田里華簪耀頽顏
卜居又依仁日夕正追攀牧人本無術命至苟復遷離念積歲序歸
途眇山川郡齋有佳月園林含清泉同心不在宴罇酒徒盈前覽君
陳迹遊詞意俱悽妍忽忽已終日將酬不能宣吐稅況重疊公門極
熬煎責逋甘首免一作退歲晏當歸田勿厭守窮轍一作勿厭守窮
賤慎爲名所牽

答王卿送別

去馬嘶春草歸人立夕陽元知數日別要使兩情傷

答裴丞說歸京所獻

執事頗勤久行去亦傷乖家貧無僮僕吏卒升寢齋衣服藏內篋藥
草曝前階誰復知次第濩落且安排還期在歲晏何以慰吾懷

答裴處士

遺民愛精舍乘犢入青山來署高陽里不遇白衣還禮賢方化俗聞

風自款關況子逸羣士栖息蓬蒿間

答楊奉禮

多病守山郡自得接嘉賓不見三四日曠若十餘旬臨觴獨無味對榻已生塵一詠舟中作洒雪忽驚新煙波見棲旅景物具昭陳秋塘唯落葉野寺不逢人白事廷吏簡閑居文墨親高天池閣靜寒菊霜露頻應當整孤棹歸來展殷勤

答端

坐憶故園人已老寧知遠郡鴈還來長瞻西北是歸路獨上城樓日幾迴

答僮奴重陽二甥僮奴趙氏甥仇重陽崔氏甥播

弃職曾守拙翫幽遂忘喧山澗依磽壻竹樹蔭清源貧居煙火濕一

作絕歲熟梨棗繁風雨飄茅屋蒿草沒瓜園羣屬相歡悅不覺過朝

昏有時看禾黍落日上秋原飲酒任真性揮筆肆狂言一朝忝蘭省

三載居遠藩復與諸弟子篇翰每相敦西園休習射南池對芳罇山藥一作茵經雨碧海榴凌霜翻念爾不同此悵然復一論重陽守故家僦子旅湘沅俱有緘中藻惻惻動離魂不知何日見衣上淚空存

答重陽

省札陳往事愴憶數年中一身朝北闕家累守田農望山亦臨水暇日每來同性情一疎散園林多清風忽復隔淮海夢想在灋東病來經時節起見秋塘空城郭連榛嶺鳥雀噪溝叢坐使驚霜鬢撩亂已如蓬

顧十二左遷過韋蘇州房杭州韋睦州三使君皆有郡中燕集詩辭章高麗鄙夫之所仰慕顧生既至留連笑語因亦成篇以繼三君子之風焉

信州刺史劉太真上

寵至乃不驚罪及非無由奔迸歷畏途緬邈赴偏一作荒陬牧此彫

弊吐屬當賦斂秋風興諒無補旬暇焉敢休前日懷友生獨登城上樓迢迢西北望遠思不可收今日車騎來曠然銷人憂晨迎東齋飯晚度南溪遊以我碧流水泊君清翰舟莫將遷客程不爲勝境留飛札謝三守斯篇希見酬

酬劉侍郎使君

瓊樹凌霜雪葱蒨如芳春英賢雖出守本是玉階人宿昔陪郎署出入仰清塵孰云俱列郡比德豈爲鄰風雨飄海氣清涼悅心神重門深夏盡賦詩延衆賓方以歲月舊每蒙君子親繼作郡齋什遠贈荆山珍高閑一作山城庶務理遊眺景物新朋友亦遠集燕酌在佳辰始唱已慙拙將酬益難伸濡毫意僿俛一用寫情勤

峽州旅舍奉懷蘇州韋郎中公頻有尺書頗積離鄉之思

令狐 峴上

儒服學從政遂爲塵事嬰銜命東復西孰堪異鄉情懷祿且懷恩策

名敢逃名羨彼農畝人白首親友并江山入秋氣草木彫晚榮方塘
寒露凝旅館涼飈生懿交守東吳夢想聞頌聲雲水方浩浩離憂何
時平

答令狐侍郎

一凶迺一吉一是復一非孰能逃斯理亮在識其微三黜故無愠高
賢當庶幾但以親交戀音容邈難希况惜別離久俱忻藩守歸朝宴
方陪廁山川又乖違吳門冒海霧峽路凌連磯同會在京國相望涕
沾衣明時重英才當復列彤闈白玉雖塵垢拂拭還光輝

酬張協律

昔人鬻舂地今人復一賢屬余藩守日方君臥病年麗思阻文一作
交宴芳蹤闕賓筵經時豈不懷欲往事屢牽公府適煩倦開緘瑩新
篇非將握中寶何以比其妍感茲棲寓詞想復痾瘵纏空宇風霜交
幽居情思綿當以貧非病孰云白未玄邑中有其人憔悴卽我愆由

來守重英俊得薦延匪人等鴻毛斯道何由宣遭時無早晚蘊器
俟良緣觀文心未衰勿藥疾當痊一云勿藥當自痊晨期簡牘罷馳
慰子忡然

卽事奉呈郎中使君

東海釣客試祕書省校書郎秦系

久臥雲間已息機青袍忽著狎鷗飛詩興到來無一事郡中今有謝
玄暉

答秦十四校書

知掩山扉三十秋魚鬚翠碧弃牀頭莫道謝公方在郡五言今日爲
君休

答賓

斜月纔鑿帷凝霜偏冷枕持情須耿耿故作單牀寢

答鄭騎曹青橘絕句一作故人重九日求橘書中戲贈

憐君臥病思新橘試摘猶酸亦未黃書後欲題三百顆洞庭須待滿
林霜

奉和聖製重陽日賜宴

聖心憂萬國端居在穆清玄功致海晏錫讌表文明恩屬重陽節兩
應此時晴寒菊生池苑高樹出宮城捧藻千官處垂戒百王程復覩
開元日臣愚獻頌聲

和吳舍人早春歸沐西亭言志

曉漏戒中禁清香肅朝衣一門雙掌誥伯侍仲言歸一作伯仲待言
歸亭高性情曠職密交遊稀賦詩樂無事解帶偃南扉陽春美時澤
旭霽望山暉幽禽響未轉一作好鳥幽未轉東原綠猶微名雖列仙
爵心已遣一作遺塵機卽事同巖隱聖渥良難違

奉和張大夫戲示青山郎

天生逸世姿竹馬不曾騎覽卷冰將釋援毫露欲垂金貂傳幾葉玉

樹長新枝榮祿何妨早甘羅亦小兒

答河南李士巽題香山寺

洛都游宦日少年攜手行投杯起芳席總轡振華纓關塞有佳氣巖
開伊水清攀林憩佛寺登高望都城蹉跎二十載世務各所營茲賞
長在夢故人安得并前歲守九江恩召赴咸京因塗再登歷山河屬
清明寂寞僧侶少蒼茫林木成牆宇或崩剝不見舊題名舊遊况存
歿獨此淚交橫交橫誰與同書壁貽友生今茲守吳郡綿思方未平
子復經陳迹一感我深情遠蒙惻愴篇中有金玉聲反覆終難答金
玉尙爲輕

答故人見諭

素寡名利心自非周圍器徒以歲月資屢蒙藩條寄時風重書札物
情敦貨遺機杼十縑單慵疎百函愧常負交親責且爲一官累況本
濩落人歸無置錐地省己已知非枉書見深致雖欲効區區何由枉

其志

訓閣員外陟

寒夜阻良觀叢竹想幽居虎符予已誤金丹子何如醺集觀農暇笙歌聽訟餘雖蒙一言教自愧道情疎

逢遇

長安遇馮著

客從東方來衣上灞陵雨問客何爲來一作來何爲采山因買斧冥冥花正開一作滿颺颺鷲新乳昨別今已春鬢絲生幾縷

將發楚州經寶應縣訪李二忽於州館相遇月夜書事因簡

李寶應

孤舟欲夜發祇爲訪情人此地忽相遇留連意更新停杯嗟別久對月言家貧一問臨邛令如何待上賓

廣陵遇孟九雲卿

雄藩本帝都遊士多俊賢夾河樹鬱鬱華館十里連新知雖滿堂中
意頗未宣忽逢翰林友歡樂斗酒前高文激頽波四海靡不傳西施
且一笑衆女安得妍明月滿淮海哀鴻逝長天所念京國遠我來君
欲一作獨還 一作又旋

淮上遇洛陽李主簿

結茅臨古渡臥見長淮流窗裏人將老門前樹已秋寒山獨過鴈暮
雨遠來舟日夕逢歸客那能忘舊遊

路逢崔元二侍御避馬見招以詩戲贈

一臺稱二妙歸路望行塵俱是攀龍客空爲避馬人見招翻跼躄相
問良殷勤日日吟趨府彈冠豈有因

逢楊開府

少事武皇帝無賴恃恩私身作里中橫家藏亡命兒朝持一作楫
一作拆檣蒲局暮竊東鄰姬司隸不敢捕立在一一作登白玉墀驪山風

雪夜長楊羽獵時一字都不識飲酒肆頑癡武皇升仙去憔悴被人欺讀書事已晚把筆學題詩兩府始收跡南宮謬見推非才果不容出守撫婢嫠忽逢楊開府論舊涕俱垂坐客何由識唯有故人知

休假日訪王侍御不遇

一本訪李廓

九日驅馳一日閑尋君不遇又空還怪來詩思清人骨門對寒流雪滿山

因省風俗訪道士姪不見題壁

去年澗水今不流去年杏花今又拆山人歸來問是誰還是去年行春客

韋蘇州集卷第五